

DISSERTATIO INAVGVRALIS JVRIDICA,  
DE  
INJVSTA JVDICIS  
IRA,



QVAM,  
EX DECRETO ET AVTORITATE  
MAGNIFICI JCTORVM ORDINIS  
IN ALMA AC PER-ANTIQA ELECTORALI  
VNIVERSITATE ERFORDIENSI,  
SVB PRÆSIDIO  
FACVLTATIS JVRIDICÆ DECANI,  
DN. CONRADI WILHELMI  
Streckers, JCTI,

PRÆFATÆ FACVLT. ET JVD. ELECT. PROVINC. ASSESSORIS, PROFESSORIS  
PVBLICI, NEC NON CIVITAT. STND. SENATORIS SENIORIS,  
ET CAVSAR. TVTEL. CONSVLENTIS,

PRO LICENTIA  
LEGITIME CONSEQVENDA,  
PVBLICÆ ERVDITORVM DISQVITIONI  
SVBMITTET

CHRISTIAN. FRID. BACKHAVSSIUS,  
NOT. CÆSAR. PVBL. IMMATRICVLATVS.

IN AVDITORIO JCTORVM MAJORI  
DIE XXIII. SEPT. M DCC XXXIII.

ERFFERTI, Typis HERINGII, Acad. Typogr.



PERILLVSTRI ATQVE EXCEL-  
LENTISSIMO

D O M I N O

ERASMO LEOPOLDO  
DE GERSDORFF,

AVGVSTISSIMI POLONIÆ ATQVE  
LITTHVANIÆ PRINCIPIS ET ELECTORIS  
SAXONIÆ SERENISSIMI VICE-  
CANCELLARIO,

DYNASTÆ IN NIEDERWALDE,

DOMINO SVO GRATIOSISSIMO  
ANTIQVITATE GENTIS ET VIRTVTIS  
INTEGRITATE MAXIME  
INCLVTO.

NEC NON  
V I R O  
PRÆNOBILISSIMO CONSULTISSIMO  
ET EXCELLENTISSIMO  
D O M I N O  
GEORGIO SAMVELI  
LVDOVICI,  
FCTO CELEBERRIMO,  
POTENTISSIMI POLONIÆ ET LITTHVANIÆ  
PRINCIPIS VT ET ELECTORIS SAXONIÆ CONSILIARIO  
AVLÆ ET IUSTITIÆ, REFERENDARIO AVLICO  
NEC NON APPELLATIONVM  
RELIQVA,  
MÆCENATIBVS STVDIORVMQVE  
PROMOTORIBVS,  
INAVGVRALEM HANCCE DISSERTATIONEM  
FIDEI SVÆ DEVOTÆ TESSERAM  
HVMILLIMA MENTE  
OFFERT ET CONSECRAT  
CHRISTIANVS FRIDERICVS BACKHAVSS.



DISSERTATIO INAUGVRALIS IVRIDICA  
DE  
INIVSTA IVDICIS IRA.

§. I.



Adfectus, ex sententia recentiorum Philosophorum, sunt *vel mere mentales, vel mere corporales, vel sensuales*. Mere mentales sunt, si commotio in mente originem habeat, etsi etiam ad corpus motus ille, imprimis si paulo vehementior fuerit, propagetur. Mere corporales adfectus, in extraordinaria tantum sanguinis commotione consistunt, per quam mens equidem quodammodo afficitur, ut aliquid sentiat seu patiatur, sed ut commotio activa non accedat. Denique sensuales adfectus dicuntur, in quibus mens & corpus ita concurrunt, ut in mente activa etiam commotio deprehendatur. Vid. ARNOID. WESENFELDIUS *georg. anim. & vit. part. 1. cap. 2. §. 2. sq.* VINGENT. PLACCIUS *accession. ethic. part. 1. cap. 4. §. 9. seqq.* Et hi sensuales definiuntur a JO. FRANC.

BVDDEO *instit. theol. moral. part. 1. c. 1. sect. 6. §. 5.* quod sint commotiones voluntatis, ex repræsentatione objectorum, cum relatione quadam ad nos spectatorum, sub ratione grati aut ingrati, & hinc spirituum animalium excitata agitatione ortæ, & iterum extraordinarium motum sanguinis efficientes, ad hominis conservationem comparatæ.

§. II.

De sede adfectuum multum & copiose disputatum est a Philosophis. Veteres sedem adfectibus assignant in adpetitu sensitivo conf. LAELIVS PEREGRINVS *de adfectib. cap. 2.*; CARTESIVS & quidam ejus discipuli sedem adfectuum intellectui tribuunt: nonnulli ex CARTESII schola, ut RYARDVS ANDALA *exercitat. academ. in philos. prim. & natur. part. 1. exerc. 9. §. 12.* certa ratione ad intellectum, & alio modo ad voluntatem, adfectus referunt. Alii contra, cum BVDDEO, sedem adfectuum unice in voluntate quærunt. Repræsentantur vero objecta non solum per sensus externos, sed etiam per imaginationem.

§. III.

Adfectus in *primitivos* & *derivativos* dispescuntur. Sed de primitivorum sive principum ac præcipuorum adfectuum numero, magna est inter Philosophos dissensio. Stoicorum, Scholasticorum, Epicuri, Cartesii aliorumque diversas sententias diligenter recensent ac eas sub examen vocant laudatus BVDDEVVS *l. c. §. 16. s. R. JO. JAC. SYRBIVS philos. prim. part. 1. cap. 6. §. 33. & JO. JAC. LEHMANNVS doctr. moral. libr. 1. c. 2. §. 77. sqq.* Quod si vero rem omnem paulo curatius expendamus, cum

cum BYDDEO & LEHMANNO, agnoscimus duos saltem adfectus primitivos, videlicet appetitum seu amorem, & aversionem seu odium. Idque vel inde comprobatur, quia objectum generale omnium adfectuum, aut bonum est, aut malum, gratum aut ingratum. Si enim in bonum aliquod fertur appetitus, vocatur amor, si in malum, ut illud aversetur & propulset, dicitur odium. Idemque ex adfectuum omnium inductione patet. Quocunque enim nomine veniant, amorem in eis offendimus vel odium; differentia autem, aut ab objecto peculiari, aut ex certa, quæ accedit, relatione; aut ex gradu vehementiori vel leniori, desumitur. Unde colligas derivativos, qui vocantur, adfectus, tantum esse certas amoris aut odii modificationes.

§. IV.

Adfectuum derivativorum septem constituunt classes JO. FRANC. BYDDEVS *l. c.* ejusque gener JO. GEORG WALCHIVS *introd. in philos. libr. 2. cap. 5. §. 20. sqq.* I. est eorum, qui ex objecti diversitate oriuntur: II. si ad objectum personale respectus diversus accedat: III. si ad amorem aut odium, accedat judicium de facilitate aut difficultate bonum consequendi, aut malum evitandi: IV. si ad amorem aut odium accedat voluntas utendi mediis, quibus obtineri bonum, aut propulsari malum possit: V. si bonum malumve, adfectus excitare aptum, mediate nos tangat: VI. est eorum adfectuum, qui ex aliis derivativis progignuntur: VII. adfectuum mixtorum, ex amore & odio conflatorum atque compositorum. Et quidem ad quartæ classis adfectus refertur ira, quæ vocatur, quando ad malum imminens

minens propulſandum, motu aliquo concitatori ferimur. Equidem, qui RENATI CARTESII placita ſequuntur, exiſtimant, iram eſſe adfectum maxime compoſitum; concurrere enim hic odium, triſtitiam, & cupiditatem depellendi mala. Sed triſtitia eſt ſpecies odii, adeoque diverſi inde conſtitui nequeunt adfectus. Cupiditas depellendi malum, itidem non eſt diverſus adfectus, ſed potius ipſam iram abſolvit; quare recte dicitur, iram eſſe ſpeciem triſtitiae, quatenus hæc ſimul malum imminens depellere ſatagit.

§. V.)

Si ſpectes moralem adfectuum æſtimationem, duo hic cavenda ſunt extrema. Alterum eſt Stoicorum, qui omnes adfectus, in ſe & abſtracte ſpectatos, malos eſſe contendunt: alterum recentiorum quorundam Philoſophorum, maxime CARTESII diſcipulorum, qui, omnes adfectus eſſe indifferentes, opinantur. Adſiſ BVDDEVN l.c. §. 32. & excellentiſſimum SCHWARZIVM in diſſert. de adfectuum morali æſtimatione. De quibusdam tamen adfectibus, ſpeciatiim de ira magna & acris eſt contentio, ſintne ſua natura mali. SENECA, philoſophus Stoicus, in *libris tribus*, quos de ira perſcripſit, iram omnem, ceu malam rejecit atque damnavit. Hic quoque *libr. 1. de ira cap. 1.* membrorum poſitum, qualis in ira vehementiori eſſe ſolet, eleganter deſcribit. *Audax, inquit, & minax vultus, triſtis frons, citatus gradus, inquietæ manus, color verſus, crebra & vehementius acta ſuſpiria, irascentium ſigna ſunt. Flagrant & micant oculi, multus ore toto rubor, exaſtuante ab imis præcordiis ſanguine. Labia quantuntur, horrent & ſubriguntur capilli, ſpiritus coarctus,*



*Bus, & stridens articulorum se ipsos torquentium sonus, gemitus, mugitusque, & parum explanatis vocibus sermo præruptus, & complosæ sæpius manus, & pulsata humus pedibus, & totum concitum corpus, magnasque minas agens, &c. Et, quemadmodum adfectus quasi caliginem quandam intellectui offundunt, ut perspicere rei veritatem non valeat, longeque aliter iudicet, quam res se habet: ita de ira dici solet: impedit ira animum, ne possis cernere verum. Magno ingenii acumine, SENECAE causam agit CHRISTIANVS THOMASIVS, Ictus & Philosophus olim Halensis longe celeberrimus, in praxi ethic. cap. 13. qui iram ambitionis filiam vocat, eamque considerat, ut plerumque in hominibus deprehenditur. Nihilominus si abstracte ira spectetur, prout tristitiam denotat, cum cupiditate malum imminens depellendi, omnis ira mala dici nequit. Mali enim depulsio vel remotio, siue per poenam illa fiat, siue alia ratione, interdum licita est & laudabilis: & cupiditas istius remotionis vel depulsionis mala esse non potest. Accedit, quod adfectus iræ summo Numini psalm. XC. 11. Christo Servatori nostro Marci III. 5. & sanctis a gentium doctore PAVLO Ephes. IV. 26. tribuatur. Licet vero hoc ad proprium, & humano more fiat, cum adfectus proprie dicti in Deum non cadant: non tamen procul dubio id fieret, si ira omnis per se mala esset, & vitiosa, uti recte infert LACTANTIUS libr. de ira Deicap. XVII & alibi. Cum & Christus homo verus fuerit, dubitandum non est, quin ira proprie sic dicta de eo prædicetur.*

§. VI.

Ira originem suam debet vocabulo ire, quod a se  
B eat

eat, qui irascitur. MATTH. MARTINIVS in *lex philo-  
log. voc. ira*. CAGNOL. in *l. quicquid* 48. num. 1. ff. de R. J.  
Unde & qui iram ponit, ad se redire dicitur: TERE-  
NTIVS in *Adelpb.* Aliis ira quasi *ura* dicta videtur. In  
irascenibus enimprehenduntur motus, qui corpo-  
ra quasi incendunt. Ita apud Plautum invenitur: *me  
semper incendit ira*: & in sacro codice veteris testamen-  
ti iram vocabula *אֵרָא* & *אֵרָא* exprimunt. Voca-  
tur quoque ira *Calor* l. 5. C. de injur. l. 7. §. 3. ff. ad L.  
*Jul. repetund.* l. 22. §. fin. ff. ad L. *Jul. de adult.* Negari  
tamen nequit hoc vocabulum latius patere, & sub suo  
ambitu alios quoque vehementes animi motus com-  
plecti. Sic juvenilis caloris mentionem facit Impera-  
tor l. 4. C. de auctor. prest. §. l. 8. §. 5. C. de bon. que lib.  
ibi: *melius est, juveniles calores coardare, ne cupidini dediti  
tristem exitum sentiant, qui eos post dispersum exspectat pa-  
trimonium.* Porro ira doloris vocabulo denotatur in l. 38.  
§. 8. ff. ad l. *Jul. de adult.* l. 4. C. eod. Cumque ira sit  
species odii, ira etiam odium appellatur l. 19. C. de inoff.  
test. Teutones iram vocant *Zorn*, a verbo *Zehren*, judi-  
ce MARTINIO, deducto nomine. Ira enim est res consu-  
mens EZECH. XXII. 31. Quamvis autem ira & iracundia  
non raro confundantur: si tamen *ἀντιπρῶτον* loqui velimus,  
ira *ἡσυχία* est, seu adfectus ipse, iracundia vero proclivitas  
& propensio naturalis ad iram, vel habitus ipse vitio-  
sus; adeoque iracundus ab irato differt, ut ebriosus ab  
ebrio & timidus a timente. SENECA *libr. 1. de ira* c. 4.  
WOLFGANG. HEIDER. *system. phil. moral.* p. 356.

§. VII.

Ira diversos habet gradus; primus vocatur indi-  
gnatio,

gnatio, secundus excandescencia, & tertius furor. Quod si vero ira pertinax est & in longum tempus durat, vocatur amaritudo. JO. JAC. LEHMANNVS *doctrin. mor. libr. 2. cap. 2. Sect. 4. §. 24.* Paululum ab hoc dissentit JO. GEORG. WALCHIVS *l. c. §. 24.* qui medio gradui simplex vocabulum iræ tribuit, & ratione durationis, iram cito transeuntem, excandescenciam, firmius vero animo insidentem, amaritudinem appellat. Excandescenciæ maxime obnoxii sunt sanguinei & voluptatibus dediti. Contra amaritudo illis fere propria est, qui ex melancholico multum trahunt temperamento: hi enim tardius iram concipiunt, sed semel conceptam animo ægerrime dimittunt. Icti duos tantum gradus iræ vulgo admittunt, statucentes iram gravem sive magnam & levem. Illa est, quæ irascentem usu rationis quodammodo privat, ut, quid dicat, faciatve, nesciat. Hæc est, quando quis a mente non est alienatus, ita, ut quicquid facit, advertat, illudque sciens & volens faciat, quamvis animo aliquo modo perturbato, adeoque sine plena deliberatione Vid. WOLFFG. AD. LAVTERBACHII *disp. de ira ejusque in jure effectib. §. 10.*

§. VIII.

Ira est vel *rationalis* vel *irrationalis*. Illa est, si voluntas a sano judicio regitur, & per idoneas repræsentationes ac rationes dirigitur, ita, ut tunc demum irascamur, quando necessitas hoc efflagitat, ac in irascendo modum servemus: hæc e contrario est, si voluntas nostra sensuilibus repræsentationibus occupatur, ut non tantum propter res minimas iram concipiamus, sed quoque in irascendo modum tenere nequeamus. S. R.

JO. GEORG. WALCHIVS. *l. c. §. lex. philos. voc. ira.* Vel quod eodem recidit, ira est vel *justa* sive licita, vel *injusta*. Justa est, quæ medium tenet, & rationem sequitur; quando scilicet aliquis irascitur, cum & quantum oportet, ita, ut nec ratione causæ, nec modi terminos excedat. Injusta vero est, quæ medium non observat, nec rationem sequitur, sed ejus præscriptum vel ratione causæ, vel modi, vel finis migrat. LAVTERBACH *l. c. §. 6. sqq.* Jcti paulo aliter justam & injustam iram, ad eum inprimis effectum, ut in delictis aliquam excusationem adferat vel non, capiunt. Justa enim ira ad illum effectum his dicitur, quæ ex justa venit causa, vera scilicet injuria irascenti illata, quæ alios quoque ad ejusmodi iram provocare potest, & in effectum, atque alterius læsione, modum ratione mensuræ non excedit; ita, ut inter injuriam irascenti illatam, & ejus vindictam, aliqua sit proportio. Injustam vero juris interpretes vocant, quæ non proficiscitur ex ejusmodi causa justa, aut dictum modum excedit, v. c. si creditor debitorem appellat ac debitum exigit, is vero iram concipit, & telo creditori vulnus infligit. Causa autem iræ ratione irascentis justa est, quæ intuitu ad iram provocantis est injusta, ita, ut ipse aliquid contra jus faciat. Item, si quæ quidem adsit justa iræ causa, sed damno, quod iratus dedit, plane non respondeat. e. g. si levi injuria verbali affectus adversarium trucidat & occidit. CARPZOV. *pr. crim. quest. 6. num. 16. & quest. 147. num. 44. sqq.* LAVTERBACH. *disp. c. §. 9.* Ira quoque est vel *affectata*, voluntatis arbitrio excitata, ut promptiori actioni inferiat, vel *non affectata*. Illa non minuit voluntatem, sed

sed eandem potius augeat, & enixam voluntatem demonstrat; perinde ac si quis eam ob causam largius bibat, ut Baccho confidentiam addente, eo audacior in scelus ruat. *Non affectata* vero audit, cujus contraria est ratio, & quæ nobis non advertentibus obrepit. LAVTERBACH. l. c. §. 35.

§. IX.

Quod si personam judicis, ejusque virtutes spectemus, quas jus divinum pariter ac civile in iudice requirunt & desiderant; nullum est dubium, quin eæ injustam iram excludant, illamque a iudice procul facefcere jubeant.

§. X.

Iudex dicitur quasi jus dicens populo. Aliis quoque nominibus passim insignitur iisque egregiis e. g. animatum jus *Novell. 105. c. 2. in fin.* & justitiæ minister. In sacris literis vocatur *דיקאן*, *דקאן* & *דין*. Et definitur vulgo iudex, quod sit persona publica inter litigantes media, quæ rem eorum in controversiam vocatam disceptat, i. e. cognoscit & definit auctoritate publica. CASP. ZIEGLER. *dicast. conclus. 10. §. 4.* Plures definitiones una cum divisionibus adfert excellentissimus CASP. ACHAT. BECKIUS *diff. de offic. jud. nob. & mercenar. cap. 2.*

§. XI.

Jus divinum vult maxime conspicuis iudicem gaudere atque imbutum esse virtutibus, sapientia, prudentia, justitia *Deut. I. 13.* fortitudine, timore Dei, amore veritatis, odio avaritiæ *Exod. XII. 21.* & *ἀπορρητοσύνη*, sive ut personarum nulla habeatur ratio *Deut. I. 17.*

Reliqua requisita, quæ his Ebrææ gentis magistri addunt, & a THOMA GOODWINO in *Mos. & Aaron. libr. 5. cap. 5. §. 2.* enarrantur, calculum non merentur. Leges civiles multa paucis complectuntur, cum iudicem bonum & innocentem virum esse præcipiunt *l. 137. §. 2. ff. de V. O. l. 4. §. 1. ff. fam. herc. conf. TOB. GRANZIVM defension. inquisitor. cap. 4. membr. 1. sect. 4. n. 46. sqq.* Carolus V. Imperator in iudice rerum criminalium exigit pietatem, honestatem, prudentiam, experientiam & eruditionem. *Vid. art. 1. const. crim. BALD. in l. 2. C. de sentent. ex peric. recit. non inepte scribit; iudex debet habere duplicem salem, scientiæ, ne sit insipidus, & conscientiæ, ne sit diabolus.*

§. XII.

Nec moratiores gentes promiscue cuilibet doctro pioque jus dicendi facultatem concesserunt, sed ut eo sanctius castiusque coleretur justitia, hanc provinciam sacerdotibus, hominibusque in sacro munere ac dignitate constitutis, demandarunt. Ut gentem Ebræam taceam, de qua tum ex sacra historia, tum ex illis, qui de republica Judæorum ex instituto scripserunt, satis constat, eam maximarum rerum disceptationi sacerdotes præfecisse, legumque ac institutorum custodiam eorum fidei commisisse: refert POMPONIVS in *l. 2. ff. de orig. jur.* interpretationem legum penes Pontifices Romanorum olim fuisse. Verba ejus, quæ digna omnino sunt, ut recitentur, hæc sunt: *Et ita eodem pene tempore ista hæc jura nata sunt, leges XII. tabb. ex his fluere capit jus civile, ex iisdem legis actiones composita sunt. Omnium tamen harum & interpretandi scientia, & actio.*

*actiones apud collegium Pontificum erant: ex quibus constituebatur, quis quoque anno praeesset privatis, & fere populus annis prope centum hac consuetudine usus est. Pari ratione Celtarum Gallorumve Druides, teste JVL. CÆSAR. libr. 6. comment. de omnibus controversiis, qua publicis, qua privatis, constituebant, & si quod fuerat admissum facinus, si cædes facta, si de hæreditate, de finibus controversa, iidem decernebant. Et certo anni tempore in finibus Carnutum, quæ regio totius Galliae media habetur, confidebant in loco consecrato, quo omnes undique qui controversias habebant, conveniebant, eorumque judiciis ac decretis finalibus tanquam sacrosanctis parebant. Nec minus notum est, Assyriorum & Persarum Magos, præter sacrum officium, civilem quoque rerum curam habuisse. Compara JO. HENR. BOECLERI *dissert. de scientia & studio Politices*, quæ subjuncta est ejusdem institution. Polit. & ZIEGLERI l. c. conclus. 16. §. 8. seqq.*

### §. XIII.

Ut quoque judicis integritas & dexteritas magis magisque confirmetur, isque intra honestatis & justitiæ limites contineatur, jurisjurandi religio adhibetur *c. veniens X. de jurejur.* Nullum quoque vinculum ad adstringendam fidem, Romani jurejurando arctius esse censuerunt, teste CICERONE *libr. 1. de offic. cap. 31.* Et ea ultima inter homines tum Græcos tum barbaros fides est, quam nulla delebit ætas, quæ per jurata pacta sponsores adhibet Deos. Unde etiam vocatur pignus & arrha fidei, quæ omnis justitiæ est fundamentum SETSER *de juram. in præfat. n. 3.* Quare nemo, nisi prius

prius sacramentum præstiterit, judicis personam sustinere potest. Quod iusjurandum, neque ex statuto, neque ex consuetudine, iudici remitti potest, quia alias eo ipso occasio in officio delinquendi suppeditaretur, quæ caute & circumspecte evitanda est. Olim in singulis causis iudices sacramenti religione adstricti fuerunt, & in leges juraverunt. *l. 14. Et authent. hodie C. de iudic.* Hodie vero sufficit, sub auspiciis officii, de administranda in omnibus negotiis judicialibus iustitia, iusjurandum præstitisse, quod deinde in singulis causis repetitum, censetur. LVDOV. GYNTH. MARTINI comment. in *Ord. proc. Saxon. tit. 1. §. 1. n. 208. sqq.* Meminit etiam iuramenti iudicum CICERO in *orat. pro Sexto Roscio Amer. c. 3.* In conceptis vero verbis iurandi *Novell. 8. circ. fin. Et art. 3. constit. crim.* CAROLI V. aliisque formulis, iudices gratiæ, odio ac iræ renunciare jubentur.

§. XIV.

Uti vero iudex omnibus pravis adfectibus nuncium mittere debet *c. iudicet. C. 3. q. 7. Et c. quatuor C. 11. q. 3.* SAM. FRIDER. WILLENBERG. *diff. jurid. de passionib. animi in iudice*: ita inprimis a capitali isto iudiciorum peste, ira iniusta immunis esse debet. Ira enim mentis alienationem inducit, & rationem perturbat *l. si adulterium 38. §. Imperator §. ff. ad l. Jul. de adulter.* silent sub turbulento ejus imperio jura, statuta, leges, & si quid salutare suggeris, operam ludis, & surdo narras fabulam. SOCRATES eum iudicem, qui sibi ipsi imperare potest, administratione esse dignum, atque omni laude celebrandum, agebat. Vid. FVLV. PACIAN.



*ir. de probat. libr. 2. cap. 44. num. 14. sq.* Quomodo vero aliis jus dicet, qui impotentis est animi, seque ipsum gubernare nescit? Qualis hic custos, qui ipse custode indiget? Per omnium quoque ora volitant versus, qui vocantur Leonini:

*In mundo mira faciunt duo, munus & ira:*

*Mollificant dura, pervertunt omnia jura.*

Hinc CLAUDIANVS imperatorem HONORIVM, inter alia, sic hortatur:

*Tu licet extremos late dominere per Indos,*

*Te Medus, te mollis Arabs, te Seres adorent;*

*Si metuis, si prava cupis, si ducere irā,*

*Servitii patiere jugum, tolerabis iniquas*

*Interius leges; tunc omnia jura tenebis,*

*Quum poteris rex esse tui.*

Prohibenda autem maxime est ira in puniendo: nunquam enim iratus, qui accedet ad poenam, mediocritatem illam tenebit, quæ est inter nimium & parum. Optandumque, ut ii, qui præsumunt reipublicæ, legum similes sint: quæ ad puniendum non iracundia, sed æquitate ducuntur, graviter monente TULLIO *libr. 1. de offic. c. 25.* Ira sæpe etiam innocentes in crimen adducit, quia dum justo amplius irascuntur judices, & alienum corrigere volunt peccatum, graviora peccata committunt, *can. ira 68. caus. 11. qu. 3. can. si Episc. 4. pr. ejusd. q. 3.* Nihil sane periculosius est, quam in puniendo irasci: cum vitæ necisque arbitrium, & ferrum irato male committantur, nullusque adfectus vindictæ cupidior sit, quam ira, teste SENECA *libr. 1. de ira c. 12. & 16.* Accedit, quod ira perniciosos habeat comites,

C

cru-

crudelitatem & furorem, a quibus in transversum agi rapique solet iudex MATTH. STEPHANI *de Offic. judic. libr. 1. cap. fin. num. 46.* Plura incommoda ac mala, quæ iram comitantur, exponit ANDREAS A MANDELSLO *de justitia postergata cap. 3.* Rectissime ergo CALLISTRATUS *in l. 19. §. 1. ff. de offic. Præsid.* præcipit, quod is, qui jus reddit, adversus eos, quos malos putat, excandescere non debeat. Quam legem, eo quod multa salutaria ad officium judicis spectantia complectitur, LAMBERTVS GORIS, Jctus Belga, & JO. PHIL. SLEVOGTIVS Antecessor olim Jenensis celeberrimus, pulcherrimis commentariis illustrarunt. Pia illa ac prudens admonitio, in curia Ratisbonensi tabulæ marmoreæ insculpta, digna est, quæ quibusvis curiis, imo singulis judicum pectoribus, inscribatur. Verba ejus, referente SCHÖNBORNERO *libr. 3. Polit. cap. 24.* hæc sunt: Quisquis Senator curiam officii causa ingrederis, ante hoc ostium privatos adfectus omnes abjicito: iram, vim, odium, amicitiam, adulationem: reipublicæ personam & curam subji- cito: nam ut aliis æquus aut iniquus fueris: ita quoque Dei judicium expectabis & sustinebis. Ipse etiam Rex ALPHONSVS dicere solitus fuit, si romanis temporibus natus fuisset, se constructurum ædificaturumque fuisse contra curiam Jovi positorio templum, in quo patres conscripti sententiam dicturi, antequam curiam ingrederentur, odia atque alias animi pestes deponerent. PANORMITAN. *libr. 3. cap. 8. de dict. & fact. Reg. Alphons.*

§. XV.

Quodsi itaque quis animadvertat, judicem sibi esse iratum vel infensum, eum tanquam suspectum recusare potest *l. 16. C. de jud. l. 15. ff. eod.* GEORG. ADAM. STRYVIVS *jurisprud. forens. libr. 4. tit. 6. aph. 1.* Periculosum enim est, coram judice suspecto litigare, ad quod ne quidem Princeps aliquem cogere potest *Gloss. in l. 14. C. de jud.* Illa autem recusatio, quæ etiam refutatio vocatur *CVIAC. libr. 9. obs. 23.* tali expeditur modo: reus libellum recusationis ipsi judici recusato offert *l. fin. G. de jud. cui causa recusationis inferitur cap. 41. §. fin. X. de appell.* Quo facto intra triduum arbitri qui de suspitione cognoscunt, eliguntur, vel ad superiorem cognitio devolvitur *GAIL. libr. 1. obs. 33. n. 11. sq.* Verum cum sæpius iudex, ob injustam iram aliosve inordinatos adfectus, sit suspectus, causa tamen suspitionis probari nequeat, interim alteri litigantium, ex indiciis non levibus, de ea constet; utilis omnino cautio est, quam SAM. STRYK. *introd. ad prax. for. c. 9. §. 15.* suppeditat, scilicet suadet litiganti, ut confugiat ad juramentum perhorrescentiæ, & petat, se ad illud admitti *c. 11. §. cum vero de rescript. in 6.* In eo autem hocce juramentum melius pinguiusque est exceptione suspecti judicis; quod is, qui ad juramentum hoc provocat, causam suspitionis specialiter non exprimere, multo minus eandem probare teneatur, sed sufficiat allegatio generalis, & stetur juramento judicium declinantis: cum nemo præsumatur, sine causa horrorem suum sub jurisjurandi religione testari. FELTMANN. *de juram. perhorrescent. disp. r. c. 4. n. 1.* Et ad hoc juramentum tam actor quam reus

admittitur, licet quod ad reum attinet, MEYVS p. 6. *decif.* 71. n. 4. & p. 2. *decif.* 154. n. 6. *sqq.* dissentiat, in cujus asserti ratiunculus inquirat, easque refellit illustris JUST. HENNING. BÖHMERS *jur. eccl. Protest. libr. 2. tit. 2. §. 73.*

§. XVI.

Quando vero agitur de vitæ discrimine, prudentioris consilii est, potius fugere; quam se irati committere judicis arbitrio *Clement pastoralis §. esto igitur de sentent. & de re judicat.* Præterea, licet fuga indicium commissi criminis dicatur in *Const. crim. Caroli V. art. 25. verif. ult.*: nihilominus in *seq. art. 27.* expresse subjicitur, fugam non esse tale indicium, ut judex fugientem deprehensum ad torturam abripere possit, nisi cum fuga alia indicia concurrant. CHRISTOPH RESOLD. *thes. pract. voc. flucht.*

§. XVII.

Nonnunquam tamen accidit, ut miseri homines fuga sibi consulere, ac irati judicis manus effugere nequeant. Si tunc Magistratus vel judex innocentem, vel quem punire non debuit, calore iracundiæ, capitali supplicio affecit, interfecitque, capite plecti jubetur, vel certe in insulam deportari. l. 7. §. *fin. ff. ad l. Jul. repet.* CARPZOV. *pr. crim. part. 3. quest. 127. n. 3. sqq.* Quæ poena cum exolverit, extraordinaria aliqua gravior aut levior, pro re nata, locum invenit ZIEGLER. *dicast. conclus. 30. §. 13.* Ac Magistratus vel judex in subditos sæviens, ob crudelitatem nimiam, jurisdictione privari solet GAIL. *libr. 1. obs. 17. n. 2.*

§. XIX.

§. XIX.

Secus se res habet, quando Princeps iratus, qui superiorem in terris non agnoscit, crudelem quandam pronunciavit sententiam. Cum enim THEODOSIUS Imperator, ira accensus, crudelissimam illam in Thessalonicenses tulisset sententiam; non solum eam publica poenitentia largiterque profusis lacrymis expiavit: sed simul publica lege constituit, ut, quando Princeps severiorem quandam ac capitalem statuit poenam, & à jure communi recedentem, illa non statim executioni mandari, sed mora triginta dierum dari debeat, ne locus poenitentiae aut misericordiae periret *l. 20. C. de poen. ibique BRUNNEMANN. can. cum apud Thessalonicam 6y C. 11. q. 3.* Ira enim ad 30. dies durare praesumitur *CASP. KLOCK. tom. 3. conf. 184. n. 11.* Quod si nec intra hoc tempus Princeps mutet sententiam, judex, cui demandata est executio, apud Principem, ea qua par est, animi submissione, intercedere, scrupulos conscientiae, qui illum vellicant, exponere, omnibusque modis tentare debet, ut istius poenae executio impediatur *REINKING. de. reg. sec. & eccles. libr. 1. class. 1. cap. 4. n. 5. HENR. NEVENHAHN. discurs. nomicopolit. de jur. consiliar. num. 101. sqq.*

§. XIX.

Judex vero in infligendis poenis, nec durior nec mitior esse potest lege, nisi gravi infamia notari velit *l. 8. §. 2. C. ad leg. Jul. de vi publ. CARPZOV. pr. crim. part. 1. quest. 24. n. 12. DIODOR. TVLDENVUS de causis corruptor. judicior. & remediis libr. 2. cap. 15. & 16.* Contra, ubi certa poena constituta non est, v. c. in delictis ex-

traordinariis, iudex liberiori decernendi potestate gaudet *l. 13. ff. de pœnis c. 4. X. de off. & potest. jud. deleg.* ita tamen, ut a iudice proportio inter delictum & pœnam temperata, & cum lenitate conjuncta, observetur *l. 11. ff. de pœn.* Accedit, quod non de privatis tantum, sed publicis etiam delictis moneat CLAUDIUS SATURNINVS, considerata ea esse septem modis: causa, persona, loco, tempore, qualitate, quantitate ac eventu, & pro ratione harum <sup>mitigandis</sup> pœnas vel exasperandas, vel mitigandas esse *l. 16. ff. de pœn.* Ac in puniendo non iræ debet indulgere iudex, sed æquitatem sequi, quæ tamen non semper in lenitate, sed interdum quoque in severitate consistit *arg. l. 1. §. 1. ff. si quis test. l. 1. ff. de eo per quem fact.* CASP. ZIEGLER. *libr. cit. conclus. 36. §. 42. sq.*

§. XX.

Fac ergo, iudicem ira abreptum, pronunciare sententiam in se justam, nihilominus tamen erit injusta sententia. GRATIANVS enim in *c. Episcopus 65. C. 11. q. 3.* triplicem constituit sententiam injustam. Aliquando, ait, sententia est injusta ex animo proferentis, justa vero ex ordine & causa: aliquando est justa ex animo ex causa, sed non ex ordine: aliquando justa ex animo & ordine, sed non ex causa. Atque de prima specie, quæ huc pertinet, addit: *Ex animo est injusta sententia, cum aliquis servata integritate judiciarii ordinis, in adulterum vel in quemlibet criminofum, non amore justitiæ, sed livore odii, vel pretio, aut favore adversariorum indutus, sententiam profert.* Unde BEDA super epistolam Jacobi ait: *Ira viri justitiam Dei non operatur: quia, qui iratus*

tus in aliquem sententiam profert, etsi ille quantum ad se, justam reportet sententiam; iste tamen, qui non amore justitiæ, sed livore odii in eum sententiam dedit, justitiam Dei in quem perturbatio non cadit, non imitatur. Et hæc omnia, quæ GRATIANVS adfert, conveniunt cum Philosophorum placitis, quippe qui solícite distinguunt inter juste agere, & justa agere. Nonnunquam aliquis justum agit, sive id, quod justum est, facit, nequaquam tamen simul juste agit. Ut enim quis juste agat, minime gentium sufficit, ut justum sit id, quod agit, sed requiritur etiam ut agat sponte, sciens & volens, adeoque actio justa proficiscatur ex interno virtutis habitu. Justus debet esse judex; at vere justus non est, qui non juste agit id quod justum est. *Juste, quod justum est, persequeris*, dicitur *Deuteron. XVI. 20.* sive ut IMMAN. TREMELLIVS vertit: *justissimam justitiam sectare.* Quomodo vero esse potest justissima, quæ oritur ex vitiosa causa efficiente. ZIEGLER *l. c. conclus. 46. §. 1. sq.* Conf. JO. LORINVS in *comment. ad Sap. VI. 5.*

§. XXI.

Quid quod? experientia proh dolor! testatur, judices inferiores sæpius ira ardere in appellantem, si ille in sententia a se tanquam ex tripode dicta acquiescere nolit; sed causam ad superiorem judicem deferat. Olim miseros appellantes variis contumeliis affectos, imo carcere & tormentis multatos esse, haud obscure colligimus ex *l. 2. l. 15. l. 22. Cod. Theodos. de appellat.* Quam injusta vero & insana sit hæc judicis ira, vel inde patet, cum, uti dicitur in *l. 15. C. Theodos. de appellat. & l. 20. C. Justin. eod. tit.* appellatio non in contumeliam

ac

ac injuriam judicis, sed in privilegium litigantis inventa sit. Tantum quoque abest, judicem primæ instantiæ appellanti succensendi habere causam; ut potius sibi gratulari debeat, quod per appellationem interpositam liberetur a periculo conventionis, cui se per injustam forte sententiam obnoxium fecerat. ZIEGLERVS *l. c. conclus. 51. §. 9.* Quam nefanda ira prosequantur judices nonnunquam causarum patronum ejusque clientem, si advocatus nullitatem processus deducat, scapham appellet scapham, Tros Rutilusve sit judex; ac ut *Specul. §. 5. num. 4. de Adv.* ait, humiliter audire judicem, ejusque omnia dicta, dicendo ei, *Domine Deus noster quam admirabilis est sapientia tua! ignitum eloquium tuum vehementer, & servus tuus dilexit illud &c.* laudibus extollere nolit, aculeato satyricoque stylo persequitur OTTO PHIL. ZAVNSCHLIFFERVS in Epistola sub nomine CONSTANTIS VERIDICI ad JUSTVM SIN-CERVVM *de hodiernæ conscientiosæ advocacy difficultate edita, quæ extat part. prior. opp. jurid. ZAVNSCHLIFFERI p. 158. sqq.*

§. XXII.

Memorabile injustæ iræ exemplum quoque præbet Achabus Samariæ rex, qui, cum Nabothus negaret, se patrimonium vineæ, aut argento ei addicturum, aut alia vinea permutaturum; ita exarsit iracundia ac stonacho, & eo flagitiorum, instigante conjuge Jezabele, venit; ut immixtis falsis testibus, infontem Nabothum criminis impiæ vocis, quod Deo regique maledixisset, damnandum, & lapidatione interficiendum curaverit, ac dein in possessionem vineæ invaserit. *1. Reg. 21. vers. 5. sqq.*

§. XXIII.



## §. XXIII.

Maxime injusta ira judicis, qui non flagitiis sed hominibus irascitur, in criminali judicio solet esse miseris inquisitis funesta & capitalis, eosque inter sacrum, quod ajunt, & saxum constituere. Iram vero ejusmodi judici inquisitori esse fugiendam, vel exemplo Josuæ patet. Hic, enim Achanem sacrilegum blande compellat: *Fili, exhibe Domino Deo Israelis hunc honorem & confitere, ne cela me aliquid ejus rei, quam feceris; de pœna vero nihil quicquam atrocitatis remisit, quam tamen iterum verbis quasi miseratoris prosequitur: cum afflixeris, inquit, nos, affligat te Dominus hac die JOS. VII. comm. 19. sqq. TOB. GRANZIVS defens. inquisitor. cap. 4. membr. 1. sect. 4. n. 136.* Operæ ergo pretium erit, missis aliis, breviter strictimque perstringere, ubi & quando ira judicis injusta potissimum in processu inquisitorio se exserere & prodere soleat. Scilicet

I. In nimia ad inquisitionem instituendam festinatione. Cum enim per inquisitionem virorum honestorum fama & existimatio vulgo imminui ac sugillari credatur CARPZOV. *præf. crim. quæst. 107. num. 17:* judex non temere & ex mera iracundia ad inquisitionem procedere debet. MEVIVS *part. 6. decis. 191. num. 3.*

II. In defensionis denegatione. Nemini sane defensio deneganda est, ne quidem diabolo, ut jurisperiti ajunt, ad exaggerandum defensionis favorem. MVND. *conf. 15. n. 78.* JAC. AYRER. *proc. jur. hist. part. 1. c. 6. obs. 2. n. 6.* Et hæc concedenda, quamvis justa defensionis causa non adpareat JUST. OL. PEKOP. *tit. 2. obs. crim. 14. n. 18.* siquidem nullum delictum tam notorium est, quod non aliquas habeat excusationes SEBAST. GVAZZIN. *def. 31. num. 5.* Imo adeo privilegiata est inquisiti defensio, ut ei renunciari nequeat MENOCHIVS *de*

D

arbi-

*arbitrar. jud. quæst. libr. 1. quæst. 7. n. 9.* & *judex ex officio*, inquisito defensorem constituere teneatur. *CARPZOV. pr. crim. quæst. 59. n. 37* Huc refertur, si aditus ad reum advocato præcluditur, qui defensori *const. crim. Carolin. art. 73.* est concessus; ut eo melius ea, quæ ad causam inquisiti tuendam faciunt, & in actis aliquanto obscurius & justo brevius consignata sunt, ex ore ipsius, secundum omnes circumstantias percipere, & plenius deducere possit. Et quamvis in plerisque judiciis non permittatur Advocato, ut solus cum inquisito, sed præsentibus actuariis aut Scabinis, colloquatur: non semper tamen eo rigore utendum esse, ne ipsam defensionis libertatem nimium restringamus, maxime cum Imperator *in d. art. 73.* hoc non determinaverit, & *l. 12. ff. de publ. jud.* hoc non evincat, existimant ZIERIZIVS, MANZIVS alique nemesis Carolinæ interpretes.

III. Quando innocens in carcerem conjicitur. Judices enim iracundia ducti, sæpius absque indicibus sufficientibus, & positihabita personæ & delicti qualitate, ad capturam provocant *CARPZOV. pract. crim. quæst. 3. n. 4. sq.* cum tamen fas & jura judici injungant, ut a captura absteineat, si sine illo iudicio satisfieri potest. *MEYVS part. 1. decis. 1. num. 3. sq.* Exemplum hujus rei est Potiphar, qui audita uxoris oratione, Josephi contra se injuriam accusantis, iratus, Josephum insonnem, & in concubitu ac congressum heræ non consentientem, in carcerem, absque prævia causæ cognitione, inclusit. *GENES. XXXIX. 19.*

IV. Si in delictis levioribus, in quæ non poena corporis afflictiva, sed vel pecuniaria vel relegationis statuta est, idoneis licet oblati fidejussoribus, captivus non dimittitur *CARPZOV. pract. rer. crim. quæst. 112. n. 45.* *DAMHOVDER. prax. rer. crim. cap. 19. n. 5. § c. 20. n. 1.*

V. Quando inquisitus intolerabili & squalidissimo carceri, ex quo valetudinis jactura metuenda est, includitur. *OLDEKOPP. obs. crim. 26. tit. 3.* Quomodo locus carceris comparatus esse debeat, exponunt *STRYKIVS dissert. de carcere ad custodiam* & *JAC. FRID. LVDOVICI. Einleit. zum peinlichen Proc. cap. 2. §. 7. seqq.*

VI.

VI. Quando iudices nimio & impotenti iustitiæ zelo flagrant, & conquisitis exiguis ac remotis indicis, inquisitum, denegata defensione pro avertenda tortura, quæstionibus sive tormentis subijciunt. OLDEKOP. tit. 4. obs. crim. 48. n. 12. Item, si iudex novo tormentorum genere, absque consensu Principis, qui hic necessarius est LVDOVICI l. c. cap. 9. §. 26. utuntur: vel si ipsi iudices non solum injurias evomunt, sed etiam violentas manus injiciunt inquisitis. Sic ex alio refert personatus VENTURA de VALENTIIS, cujus nomen est, GEORGIVS VALENTINVS WINTHERVS *Partbenii litigiosi libr. 1. cap. 14. n. 34.* aliquem judicem rei capillis apprehensi caput ad columnam allisisse, dicendo: *confitearis & dicas veritatem ribalde*, quæ vox significat hominem scelestum & nebulonem. vid. BESOLD. *thes. pract. voc. Ribaldus.*

VII. Quando iudex litteris, quibus sententia Jctorum extraneorum exquiritur, *der Urtheils-Grage*/ quædam immisceat de delicti circumstantiis, quarum in actis nulla sit mentio OLDEKOP. obs. crim. 8. n. 2. tit. 1. siquidem istiusmodi litteræ generaliter sunt concipiendæ. JO. GVIL WÜNSCH. de act. judicial. cap. 13. §. 3. n. 5. & RENNEMANN. de transmiss. actor. cap. 6. n. 17. Vel quod eodem recidit, si iudex in litteris singularibus, iisque arcanis, *denen Beybriefßen*, inquisitum gravare studeat WÜNSCH. l. c. n. 7. & OLDEKOP. s. l. n. 5.

VIII. Quando ea in actis omittuntur tanquam superflua, quæ si curatius expendantur, omnino faciunt ad inquisiti qualemcunque defensionem & excusationem: e contrario illa sollicite ac cumulate consignantur, quibus rei causa gravior duriorque redditur OLDEKOP. obs. crim. 7. n. 13. tit. 1.

IX. Quando iudex nuda concedendi saluum conductum promissione, reum lætat, quo securum reddat petentem, eumque comprehendendi occasionem inveniatur; vel plane recuset securitatem præstare. MEY. decis. 211. n. 6. sqq. part. 4. & comment. ad jus Lubec. libr. 1. tit. 1. art. 11. n. 15. sqq.

X. Quando iudex inferior, absque jussu & consensu Principis, sententiam in favorem inquisiti latam, ab actis removet, & acta ad aliud Jctorum collegium transmittit. Vid. CHRIST.

THE-

THOMASII. *differt. de iudice sententiam in causis criminal. latam ab actis removente.* Vel sexcenta alia iniustæ iræ in criminalibus proferrem exempla, nisi brevitati, ob angustiam temporis, danda esset opera. Cum quoque difficilius sit iram continere, quam miracula facere CARPZOV. *pract. crim. quæst. 6. n. 5.* regulariter non licet in sua aut suorum causa iudicis fungi officio ZIEGLER. *l. c. concl. 12.*

§. XXIV.

Caveat ergo sibi quilibet, ne cum iudice litiget & contendat, eumque ad iram provocet, *ECCLESIASTIC. VIII. 1. & 13.* Secus enim, quæ vis est & effectus idearum associationis, nisi nexus iste diuturnitate temporis, vel aliis intercedentibus causis, dissolvatur, iudicem sibi semper insensum & iratum habebit. Vid. JO. LOCKIUS *de intellectu. hum. libr. 2. cap. 33.* JO. FRANC. BVDDEVS *instit. theol. mor. part. 1. cap. 1. sect. 5. §. 9.* & JO. FRIDER. WYCHERER. *in dissert. de idearum connexion. ejusdemque effectib.*

§. XXV.

Judex vero reprimet injustam iram, eamque cane pejus & angue detestabitur, si sedulo cogitet; iram injustam Deo omnium iudici supremo, qui vices suas in his terris, iudicibus inprimis superioribus, & Principibus, demandavit, ceu vitium execrabile & piacularare displicere: illamque iram iurjurando, quo fidem dat iudex, se justitiam ubique, cunctis hominibus, procul facessere iussis quibuscunque pravis adfectibus, esse administraturum, quam maxime repugnare. Reliqua remedia, quibus ira supprimenda est & regenda, fuse persequuntur, PLYTARCHVS & supra laudatus HEIDERVS elegantissimis commentariolis *de ira cobibenda*: JAC. THOMASIVS *de remediis iracundia*, ALOYSIVS LVISIVS, *de compeſcendis animi affectib.* libr. 2. cap. 5. & 6. & passim alii moralis philosophiæ magistri.

T A N T V M.

